

**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ**  
**ԽՈՍՔԸ ԴԻԼԻՋԱՆԻ ԵԿԵՂԵՑՈՒ ՀՈՂՕՐՀՆԵՔԻ**  
**ԱՐԱՐՈՂՈՒԹՅԱՆ ԱՌԻԹՈՎ**  
(30 հոկտեմբերի, 2015 թ.)

Հայրապետական սիրով ողջունում եւ Մեր օրհնությունն ենք բերում բարեպաշտ Մեր գավակներին, հողօրհների այս արարողության բոլոր մասնակիցներին:

Հոգու բերկրանքով այսօր կատարեցինք հողօրհների արարողությունը Դիլիջանում կառուցվելիք եկեղեցու, որի կառուցումն իրականացվելու է Առաքելական մեր Սուրբ Եկեղեցու արժանավոր գավակ Տիար Ռուբեն Վարդանյանի սրտաքույլ բարերարությամբ:

Դարեր շարունակ Հայաստանի բոլոր բնակավայրերում եկեղեցական կառույցներ, աղոթավայրեր են հիմնվել մեր բարեպաշտ հայրերի ջանքերով՝ հավատացյալ հայորդիներին հոգատարություն եւ հոգևոր խնամք ցուցաբերելու, Աստծո հետ հաղորդակցությունը մշտաբան ու կենդանի պահելու համար:

Խորհրդային եկեղեցահալած քաղաքականության տարիներին բազմաթիվ եկեղեցիներ եւ եկեղեցապատկան կառույցներ քայքայվեցին ու ավերվեցին, Հայաստանի շատ բնակավայրեր զրկվեցին աղոթավայրերից եւ սրբավայրերից, ինչպես՝ Դիլիջան քաղաքը: Այսօր մեր հայրենիքի տարբեր շրջաններում հայ եկեղեցական ճարտարապետական ավանդույթների պահպանությամբ նոր եկեղեցիներ են կառուցվում, նոր աղոթավայրեր են հառնում, որոնցից պիտի լինի նաեւ Դիլիջան քաղաքի եկեղեցին: Հայաստանի վերջին տասնամյակների պատմության մեջ Դիլիջանը ճանաչվել է որպես հանգստի ու զրոսաշրջության նշանակալի կենտրոն: Ուրախ ենք, որ այս տարիներին Դիլիջանում շարունակվել են արձանագրվել նոր հաջողություններ՝ կրթական, զրոսաշրջային եւ տարաբնույթ այլ կառույցների հիմնումով: Հավատում ենք, որ եկեղեցու կառուցումը պիտի ամրոջացնի զարգացող Դիլիջանի ընդհանուր պատկերը եւ աստվածային երկնառաք նոր օրհնություն բերի այստեղ բնակվող Մեր գավակների հոգևոր-եկեղեցական կյանքում:

Եկեղեցին սուկ ճարտարապետական կառույց չէ, այլ սրբազան ու նվիրագործված այն վայրն է, որտեղ հաղորդակցվում են մարդը եւ Աստված, բաշխվում են երկնային շնորհները, գորանում են հավատացելոց հոգիները, ամրապնդվում է վճռականությունը՝ աստվածաշնորհի կյանքը զարդարելու բարի եւ ազգանպաստ գործերով: Եկեղեցին հուշարարն է նաեւ մեր առաքելության՝ ապրելու Բարձրյալի կամքի ու պատվիրանների համաձայն, հեռու մնալու մեղքից եւ չարիքից, ազգային-եկեղեցական մեր անդաստանում առատացնելու հայրենաշեն ու ազգաշեն աստվածահաճո ձեռնարկումները:

Աստծո եւ Եկեղեցու հանդեպ հավատքի ամրությունը գրավականն է եղել ու շարունակելու է լինել մեր ժողովրդի գոյատևման եւ առաջընթացի, նոր ձեռքբերումների ամրագրման, հայոց լուսավոր, նոր գալիքի կերտման: Եւ Դիլիջանում կառուցվելիք եկեղեցին՝ հոգևորականների սպասավորությամբ, իր կարելու առաքելության արդյունավորմամբ, նշանակալի ներդրում է բերելու մեր ժողովրդի լույս հավատքի գորացմանը, հայորդյաց հոգևոր գիտելիքների ամրապնդմանը, նոր սերնդի քրիստոնեական դաստիարակության իրականացմանը:

Հայրապետական Մեր օրհնությունն ու բարձր գնահատանք ենք բերում կառուցվող եկեղեցու բարերարին՝ Տիար Ռուբեն Վարդանյանին, որ ազգասեր ու եկեղեցանվեր ոգով մշտապես բարի ձեռնարկումներով աջակից է մեր Սուրբ Եկեղեցու եւ Մայր Աթոռ Սուրբ Էջմիածնի առաքելության արգասավորմանը: Արժանավոր հայորդու անվան հետ են կապված ազգանվեր ու եկեղեցաշեն մի շարք ձեռնարկումներ, ինչպես՝ Դիլիջանի միջազգային դպրոցի հիմնումը, Վրաստանի Ս. Գևորգ եկեղեցու նորոգումը, Տաթևի բարեկարգումը, Ցեղասպանության 100-ամյակին մեկնարկած «100 կյանք ծրագիրը»՝ կոչված երախտագիտություն արտահայտելու այն անհատներին ու կազմակերպություններին, որոնց հերոսական ջանքերի շնորհիվ Հայոց ցեղասպանության ժամանակ փրկվեցին բազմաթիվ հայեր, ինչպես եւ այլ ծրագրեր, որոնք կոչված են գորացնելու մեր ժողովրդի հոգևոր ու ազգային կյանքը:

Մեր օրհնությունն ու գնահատանքն ենք բերում Տավուշի թեմի առաջնորդ Գերաշնորհ Տ. Բագրատ եպիսկոպոս Գալստանյանին եւ տիրալնամ թեմի հոգևոր դասին՝ հավատավոր Մեր ժողովրդին իրենց նվիրյալ ծառայությունը մատուցելու, հավատքի լույսը, ազգանվիրումն ու հայրենասիրությունը բարեպաշտ հայորդյաց հոգիներում վառ պահելու համար:



Ամենայն հոգիք, օրհնեցէք զՏէր (Սաղմ. ճԾ. 6)



Դիլիջան քաղաքում կառուցվող նկնդնցու մանրակերտը



Եկեղեցին սրբազան ու նվիրագործված այն վայրն է,  
որտեղ հաղորդակցվում են մարդը և Աստված



Օրհնելիք զՏէր խոստովանութեամբ,  
սաղմոս ասացել նմա օրհնութեամբ (Մաղմ. ՃԽԶ. 7)

Մեր գնահատանքը նաև մարգային իշխանություններին, մարգպետին, Դիլիջանի քաղաքապետին՝ մեր Սուրբ Եկեղեցու առաքելությանն ըստ ամենայնի աջակցելու և գորակցելու համար:

Հայրապետական Մեր օրհնությունն ու բարեմաղթանքն ենք բերում ձեզ, սիրելի հավատավոր զավակներ Մեր, և հայցում Բարձրյալի պահպանությունն ու հովանին ձեր կյանքին: Մաղթում ենք, որ Տերը աջակից լինի բոլորին, ովքեր նախանձախնդիր իրենց ջանքերն են ներդնելու եկեղեցու շինության աստվածահաճո ձեռնարկին՝ բարեհաջող իրականացնելու նվիրական աղոթավայրի կառուցման սրբազան գործը:

Ի խորոց սրտի աղոթում ենք առ Աստված, որ խաղաղության ու ապահովության մեջ պահպանի հայրենի մեր երկիրը ամենախնամ Իր Սուրբ Աջով, հաջողություններով պսակի եկեղեցաշեն ու ազգանպաստ կարևոր իրազործումները, երկնառաք բյուր պարգևներ շնորհի հավատավոր ազգիս հայոց ի հայրենիս և ի Սփյուռս աշխարհի:

*«Շնորհք, ողորմութիւն, խաղաղութիւն յԱսրուծոյ ի Հօրէ, և ի Տեառնէ Յիսուսէ Քրիստոսէ Որդոյն Հօր, ճշմարտութեամբ և սիրով եղիցի ընդ ձեզ» (Բ. Յովհ. Ա. 3). ամէն:*

